

三
國
志
注
補

三國志注補卷四十六

仁和趙一清撰

吳志孫堅孫策第一

孫堅字文臺吳郡富春人蓋孫武之後也

御覽卷五百五十九引幽明錄曰孫鍾吳郡富春人堅之祖也與母居至孝篤信種瓜爲業忽有三年少詣之乞瓜鍾爲設食臨去曰我司命也感君不知何以相報此山下善可作冢復言欲連世封侯而數世天子耶鍾晚曰數代天子故當墳所築便爲定墓曰君可出百步後顧見我去處是墳所也山下行百步便顧見悉化成白鶴也宋書符瑞志同鍾死卽葬其地水經漸江水注浙江又東北逕富春縣南江南有山

孫武皇之先所葬也張習孔雲谷卧餘曰劉敬叔異苑載堅父名鍾因施瓜供異人而獲吉地敬叔劉宋時人而宋書以鍾爲堅祖與幽明錄同一情案此傳不稱父名似當依異苑以鍾爲堅父寰宇記卷九十三謂堅居陽平山其祖種瓜於此郡縣志謂堅其玄孫恐非

及母懷妊堅夢腸出繞吳昌門

昌門本日閭閻門亦曰閭門也

注靈帝紀曰昌以其父爲越主也

後漢書注作越王今餘姚有陽明洞昌或因地僭號

與其子韶扇動諸縣眾以萬數堅以郡司馬募召精勇得千餘人與州郡合計破之

咸淳臨安志皇甫巖在於潛東一十五里近平越城舊志云
皇甫嵩破妖賊許生於此故名攷史靈帝熹平元年會稽人
許昭聚眾自稱大將軍立父生爲越王攻破郡縣遣揚州刺
史臧旻丹陽太守陳黃計破之三年十一月大破許生於會
稽斬之皇甫嵩傳止載討黃巾賊張角之事而不及許昭贊
中所云僞捷陳穎亦弭於越是時陳國穎川各有賊起朱儁
與皇甫嵩共平之嵩曾駐兵於此史逸不載亦未可知三國
志孫堅傳云妖賊許昌起於句章則又與漢史所載不同一
清案許生今傳作許昌許昭今傳作許韶是爲異也潛君高
所引漢史是漢書靈帝紀注引東觀記方輿紀要卷九十二
句章城在寧波府慈谿縣西南三十五里秦置縣漢因之屬

會稽郡

詔書除堅鹽漬丞

後漢書郡國志廣陵郡鹽漬故屬臨淮今淮安府之鹽城縣也

中平元年黃巾賊帥張角起於魏郡

後漢書五行志張角兄弟起兵冀州自號黃天三十六方四面出和將帥星布吏士外屬因其疲餒牽而勝之注引物理論曰黃巾被服純黃不將尺兵肩長衣翔行舒步所至郡縣無不從是曰天大黃也晉書輿服志巾以葛爲之形如帽而橫著之古尊卑其服也故漢末妖賊以黃爲巾世謂黃巾賊白稱黃天泰平三月甲子三十六萬

萬疑作方

漢遣車騎將軍皇甫嵩中郎將朱雋將兵討擊之

後漢書皇甫嵩傳初鉅鹿張角自稱大賢良師奉事黃老道畜養弟子跪拜首過符水咒說以療病病者頗愈百姓信向之角因遣弟子八人使於四方以善道教化天下轉相誑惑十餘年間祇徒數十萬連結郡國自青徐幽冀荆揚兗豫八州之人莫不畢應遂置三十六方方猶將軍號也大方萬餘人小方六七千冬立渠帥言蒼天已死黃天當立歲在甲子天下大吉以白土書京城寺門及州郡官府皆作甲子字中平元年大方馬元義等先收荆揚數萬人期會發於鄴元義數往來京師以中常侍封諱徐奉等爲內應約以三月五

月內外俱起未及作亂而張角弟子濟南唐周上書告之於是車裂元義於洛陽靈帝以周章下三公司隸使鉤盾令周斌將三府掾屬案驗宮省直衛及百姓有事角道者誅殺千餘人推考冀州逐捕角等角等知事已露晨起馳敕諸方一時俱起皆著黃巾爲標幟時人謂之黃巾亦名爲蛾賊殺人以祠天角稱天公將軍角弟寶稱地公將軍寶弟梁稱人公將軍所在燔燒官府劫畧聚邑州郡失據長吏多逃亡旬日之間天下響應京師震動又云嵩與角弟梁戰於廣宗大破之斬梁角先以病死乃剖棺戮屍傳首京師嵩復與鉅鹿太守馮翊郭典攻角弟寶於下曲陽又斬之首獲十餘萬人築京觀於城南

注續漢書曰儁字公偉會稽人

後漢書儁傳云會稽上虞人

注少好學爲郡功曹察孝廉舉進士

何云史言舉進士始此

卓對應不順

何云北宋本作應對

卓素著威名於隴蜀之間

通鑑作卓素著威名河隴之間

堅曰明公親率天兵

天疑作大

時長沙賊區星自稱將軍

方輿紀要卷八十鍾武城在衡州府西八十里漢縣屬零陵郡後漢改爲重安初平中賊區星嘗據此孫堅討平之三國吳屬衡陽郡

乃以堅爲長沙太守

寰宇記卷九十三富陽縣孫洲吳錄浙江經縣前過江中有沙漲吳武烈帝爲郡吏赴府鄉人餞之會於洲上父老曰此沙狹而長君其爲長沙太守乎後果如父老之言因於長沙起兵爲吳始祖遂名此沙爲孫洲

周朝郭石亦帥徒眾起於零桂與星相應

後漢書靈帝紀中平四年十月零陵人觀鵠自稱平天將軍寇桂陽長沙太守孫堅擊斬之

注吳錄

隋書經籍志晉有張勃吳錄三十卷亡一清案左傳宣二年正義引吳錄地理志曰武陵沅南縣以南皆有犀是唐時此書尚存也

注陳郡太守胡軫爲大督護

後漢書董卓傳注引九州春秋作東郡太守續志有陳國無陳郡至曹魏始廢國爲郡陳乃東之譌

注去陽人城數十里

水經汝水注東與廣成澤水合水出狼臬山北澤中澤水又東南入於汝水汝水又東得魯公水口水上承陽人城東魯公陂城古梁之陽人聚也卓傳注陽人聚故城在汝陽梁縣

西方輿紀要卷五十一廣成澤在汝州西四十里有廣成聚
靈帝置河南八關之一也

注而孫堅隨周慎行謂慎求將萬兵造金城使慎以二萬作後
駐邊韓城中無宿穀當於外運畏慎大兵不敢輕與堅戰而堅
兵足以斷其運道兒曹用必還羌谷中涼州或能定也溫旣不
能用孤慎又不用堅自攻金城壞其外垣馳使語溫自以克在
旦夕溫時亦自以計中也而度遼兒果斷葵園慎棄輜重走
卓傳邊章韓遂敗走榆中溫乃遣周慎將三萬人追討之溫
參軍事孫堅說慎曰賊城中無穀當外轉糧食堅願得萬人
斷其運道將軍以大兵繼後賊必困乏而不敢戰若走入羌
中并力討之則涼州可定也慎不從引軍圍榆中城而章遂

分屯葵園峽反斷慎運道慎懼乃棄車重而退方輿紀要卷六十葵園峽在蘭州西

堅乃前入至雒修諸陵平塞卓所發掘

卓傳卓自出與堅戰於諸陵墓間卓敗走卻屯澠池聚兵於陝堅進洛陽宣陽城門更擊呂布布復破走堅乃埽除宗廟平塞諸陵分兵出函谷關至新安澠池間以截卓後注引洛陽記洛陽城南面有四門從東第三門方輿紀要卷四十八洛陽南面四門西曰小苑門亦曰謬門冰室門也門內有冰室魏晉以後爲宣陽門一清案蓋史氏追攷之

注堅軍城南甄官井上

方輿紀要卷四十八甄官井在故洛陽城中甄官掌琢石陶

土之事

注旦有五色氣

續輿服志注引吳書旦上有每字

注掌璽者以投井中

後漢書輿服志注引吳書曰漢室之亂天子北詣河上六璽不自隨掌璽者投井中孫堅北討董卓頓軍城南官署有井每旦有五色氣從井出堅使人浚得傳國璽其文曰受命於天既壽永昌方圍四寸上有紐文盤五龍璫七寸管龍上一角缺

注虞喜志林曰

隋書經籍志志林新書三十卷梁有廣林二十四卷又後林

十卷虞喜譌

注應氏漢宮皇甫世紀

宮乃官之譌下同隋志漢官儀十卷應劭譌帝王世紀十卷
皇甫謐譌起三皇盡漢魏

注吳時無能刻玉

中華古今注孫文臺獲青玉馬鞍其光照於衢路

注若如喜言則此璽今尚在孫門匹夫懷璧猶曰有罪而況斯
物哉

孫堅於井中得傳國璽堅死袁術逼其夫人而奪之術死軍
破徐璆得而獻之後漢書徐璆傳云得其盜國璽及還許上
之是也章懷注引堅事以證之而裴世期猶以吳亡不見此

聖相詰難可謂得其一而忘其二也

表遣黃祖逆於樊鄧之間堅擊破之追渡漢水

樊樊城鄧鄧城也方輿紀要卷七十九樊城在襄陽府城北漢江上與襄陽城隔江對峙後漢末爲戍守處鄧城在襄陽府東北二十里唐貞元末移臨漢縣治古鄧城遂爲鄧城縣又元和志鄧寨故城在臨漢縣東南二十二里南臨宛口阻一小山號曰鄧寨孫堅破黃祖於此山下魏嘗於此治舟艦伐吳陸士衡辨亡論魏氏浮鄧寨之舟下漢陰之眾謂此也單馬行峴山爲祖軍士所射殺

方輿紀要卷七十九峴山在襄陽府城南七里亦曰南峴又曰峴首山

注劉表將呂公

後漢書劉表傳注公作介

注吳錄曰尊堅廟曰始祖墓曰高陵

方輿紀要卷二十五丹陽縣治曲阿吳陵在縣西十五里孫堅葬此

堅墓還葬曲阿

水經湘水注引郭頒世語云魏黃初末吳人發吳芮冢取木於縣立孫堅廟宋書禮志孫權不立七廟以父堅嘗爲長沙太守長沙臨湘縣立堅廟而已權旣不親祠直是依後漢奉南頓故事使太守祠也堅廟見尊曰始祖廟而不在京師又以民人所發吳芮冢材爲屋未之前聞也又水經漸江水注

浙江巡亭山西山上有孫權父冢一清案亭山在吳郡富春
孫堅不葬此也策傳云還葬曲阿而權傳太元元年秋八月
大書吳高陵松柏斯拔參之謝詢請置守冢之文則文臺定
葬於吳也吳地記云堅墓在盤門內劉昭續志注於吳郡吳
縣下引皇覽曰縣東門外孫武冢蓋春秋時孫武子耳於文
臺何與吳地記亦爲謬也

興平元年從袁術術甚奇之以堅部曲還策

世說孫策年十四詣袁術俄而外通劉豫州來孫便求去袁
曰劉豫州何若荅曰英雄忌人旣出下東階劉立德從西階
上但得轉顧視孫足下行殆不能復前

注策曰一與君同符合契同有永固之分

何云下同字疑因之誤

注策遂詣丹陽依舊

一本舊作舅是也

策攻康拔之

後漢書陸康傳康字季寧吳人袁術屯兵壽春部曲饑餓遣使求委輸兵甲康以其叛逆閉門不通內脩戰備將以禦之術大怒遣其將孫策攻康圍城數重康固守吏士有先受休暇者皆遁伏還起暮夜緣城而入受敵二年城陷月餘發病卒年七十宗族百餘人遭離饑厄死者將半朝廷愍其守節拜子儻爲郎中

繇遣樊能于麋陳橫屯江津

寰宇記卷一百二十四橫江浦在和州歷陽縣東南二十六里建安初孫策自壽春欲經畧江東揚州刺史劉繇遣將樊能于麋屯橫江孫策破之於此一清案此則橫江之津名也而吳夫人傳及此注引江表傳亦只有樊能于麋二人無陳橫姓名則陳字疑東之譌橫屯二字當倒互

張英屯當利口以距術

寰宇記卷一百二十四當利浦在和州城東十二里本名楊浦

注江表傳曰策渡江攻繇牛渚營

方輿紀要卷二十九牛屯河在和州南四十里與江東牛渚圻相對孫策攻劉繇牛渚營卽此地也

注禮據秣陵城

方輿紀要卷二十秣陵城在應天府東南五十里秦縣漢屬丹陽郡

注卽遣將於茲鄉策遣步騎數百挑戰

於茲人姓名笮融遣於茲向策策乃遣步騎數百挑戰於文當重一策字鄉與嚮通用

注策以融所屯地勢險固

方輿紀要卷二十七自建康沂江而上過白土磯入慈湖夾笮融嘗屯兵於此

注乃舍去攻破繇別將於海陵

方輿紀要卷二十雨花臺在應天府城南一里據岡阜高處

俯瞰城闕江山四極無不在目卽聚寶山之東嶺也山麓爲
梅岡或謂之梅陵相傳漢梅錡屯兵地孫策破劉繇別將於
梅陵卽此然則海陵乃梅陵之誤

注轉攻湖孰江乘皆下之

方輿紀要卷二十湖孰城在上元縣東四十五里江乘城在
應天府東北七十里漢縣屬丹陽郡一清案二縣宋書州郡
志云吳省爲典農都尉

劉繇棄軍遁逃

一本作逃遁

注長吏委城郭鼠伏山草

胡三省云山草言深山茂草之中也李固對策曰臣伏從山

草痛心傷意則山草二字當時常語也

注吳錄曰時有烏城鄒他錢銅及前合浦太守嘉興王晟等

嘉興之名至孫權立子和爲太子始改不應於伯符之世先立此稱實字記卷九十五引吳錄地理志敘說分明

注策引白刃斫席

何云刃字宋本作側

注輿有勇力虎眾以其死也

何云以字宋本作聞

以孫賁爲豫章太守分豫章爲廬陵

宋書州郡志廬陵郡屬之西昌東昌吉陽巴丘興平陽城高昌新興諸縣並云吳立也方輿紀要卷八十七廬陵縣孫策

於縣置廬陵郡晉移治石陽

注欲令諸軍振旅於河北通謀黑山

何云於字衍紹爲衛兄故不斥其名後漢書衛傳載此書云
河北異謀於黑山是也

注世人多惑於圖緯而牽非類

牽下何氏校增引字

曹公表策爲討逆將軍封爲吳侯

何云以絕衛故授討逆之號

注江表傳曰建安二年夏漢朝遣議郎王輔奉戊辰詔書曰

何云輔宋本作誦亦見吳夫人傳

注詭詐百姓聞其言以爲不然

何云百姓下宋本有始字

注瑪陰襲圖策

何云襲圖二字宋本作圖襲

注仰榮寵顧

何云寵顧二字宋本作顧寵

時豫章上繚宗民萬餘家在江東

水經贛水注繚水導源建昌縣東逕新吳縣又逕海昏縣謂之上繚水

策輕軍晨夜襲拔廬江

方輿紀要卷二十六廬州府舒城縣漢爲廬江郡治建安四年孫策襲廬江取之魏移郡治陽泉而虛其地

注就劉勳於皖城

方輿紀要卷二十六皖城在安慶府西北建安四年孫策襲克之既而曹操取其地操恐江表郡縣爲孫權所略徙民東渡江西遂虛合肥以南唯有皖城建安十九年權攻皖城克之遂爲重鎮

注西討黃祖行及石城

寰宇記卷一百十二黃石城在鄂州西北二百九十里劉勳爲孫策所破遂奔曹公卽此城也胡三省注通鑑引水經注牛渚城及貴池石埭二縣爲漢石城縣地誤

注勳走入楚江從尋陽步上到置馬亭

續郡國志注尋陽有置馬亭劉勳士眾散處方輿紀要卷八

十五置馬亭在九江府西

注乃投西塞至沂築壘自守

方輿紀要卷七十六西塞山在武昌縣東百三十里圖經云
山高百六十丈周三十七里吳楚分界處也既險且峻橫嶠
枕江危峰對岸長江東注高浪飛翻建安四年孫策破黃祖
子射處也沂字上有脫誤當作流沂西塞山有流沂城劉勳
走保流沂求救於黃祖卽此

注斬虎狼韓晞已下二萬餘級

何云虎卽表從子狼字疑誤

又爲子章取賁女

章卽任城王彰也

注令追者若及於船江上便殺之

何云宋本作及船於江上

注志林曰初順帝時琅邪宮崇詣闕上師于吉所得神書於曲陽泉水上白素朱界號太平青領道凡百餘卷

漢書地理志東海九江皆有曲陽縣應劭並云在淮曲之陽後漢以東海曲陽屬下邳於九江曰西曲陽此則東海之曲陽也青當作清後漢書襄楷傳宮崇所獻神書百七十卷號太平清領書其言以陰陽五行爲家而多巫覡雜語有司奏崇所上妖妄不經乃收藏之後張角頗有其書焉注云神書卽今道家太平經也其經以甲乙丙丁戊己庚辛壬癸爲部每部一十七卷

注吳郡太守許貢

方輿紀要卷九十一永縣城在湖州府西北興平初吳郡太守許貢奏分烏程置三國時廢

注後騎尋至皆刺殺之

通鑑考異云貢先爲朱治所迫已去郡依嚴白虎安能復爾
蓋策破白虎時殺貢耳

注但劉表君臣

何云但字安溪改且

善相吾弟呼權佩以印綬謂曰舉江東之眾決機於兩陳間與
天下爭衡卿不如我舉賢任能各盡其心以保江東我不如卿
此文全用吳錄善相吾弟下尚有慎勿北渡四字蓋策之遺

三國志卷四十六
教而張昭幾背之何耶

注推几大奮

何云推宋本作推

權稱尊號追謚策曰長沙桓王

吳地記盤門內東北二里有後漢破虜將軍孫堅墳又有討
逆將軍孫策墳一清案御覽卷百九十引異苑曰餘姚縣倉
封閉完密而年年輒大損耗後伺之乃是富陽縣桓王陵上
雙石龜所食卽斷毀龜口於是無復虧減則伯符亦還葬祖
墓不在吳矣敬叔之言爲有徵也又宋書禮志孫權於建業
立兄長沙桓王廟於朱爵橋南權疾太子所禱卽策廟也

注孫盛曰至陳氏之評其未達乎

容齋續筆云孫盛說迂謬漢室中興出於伯升光武感其功業之不終建武二年首封其二子爲王而帝子之封乃在一年之後司馬昭繼兄師秉魏政以次子攸爲師後常云天下者景王之天下欲以大業歸攸以孫權視之不可同日論也

番禺許之璇初校

番禺陶邵學覆校

陽湖吳朗寅再覆校

三國志注補卷四十七

仁和趙一清撰

吳志吳主第二

而天下英豪在州郡

在上一本有布字

使丞之郡行文書事

時以顧雍爲丞代陸昭

注婦女或丸泥而吞之

何云泥宋本作土

使呂範平鄱陽會稽

胡三省曰呂範傳止云鄱陽以地攷之會稽二字衍

程普討樂安

方輿紀要卷八十五樂平縣在饒州府東百二十里漢餘汗縣地建安中孫氏析置屬豫章郡孫休永安中改屬鄱陽郡注孫子兵法

隋書經籍志孫子兵法二卷吳處士沈友譔

十年權使賀齊討上饒分爲建平縣

宋書州郡志上饒男相吳立太康地志有王隱地道無一清案晉書地理志無上饒蓋廢省矣而建平之名兩史志皆不載方輿紀要卷八十五上饒故城在廣信府西北天津橋之原孫吳時置縣於此隋廢今社稷壇卽其故址也

十二年西征黃祖虜其人民而還

方輿紀要卷七十六蘄州漢屬江夏郡建安十二年吳分置
蘄春郡一清案宋書州郡志尋陽太守尋陽本縣名二漢屬
廬江吳立蘄春郡尋陽縣屬焉晉太康元年省蘄春郡以尋
陽屬武昌改蘄春之安豐爲高陵及邾縣皆屬武昌據此可
知吳蘄春郡所屬益三縣也

十三年春權復征黃祖祖先遣舟兵拒軍都尉呂蒙破其前鋒
而凌統董襲等盡銳攻之遂屠其城

方輿紀要卷七十六黃州府東有武磯山相傳黃祖屯兵陽
邏鎮薊武其上又卻月城在漢陽府治北六里與魯山相對
形如卻月後漢末黃祖所守處建安十三年孫權奪沔口攻
屠其城水經注魯山左卽沔水口西左有卻月城亦曰偃月

星是也

使賀齊討黟歙

黟音伊歙音攝

分歙爲始新新定注吳錄曰晉改新定

爲遂安黎陽休陽縣注吳錄曰晉改休陽爲海鹽以六縣爲新都郡

黟歙二縣今江南徽州府屬方輿紀要卷九十始新城在浙江嚴州府淳安縣西六十里威平鎮吳賀齊置縣於此爲新都郡治遂安縣本歙縣南鄉之安定里孫氏析置新定縣紀要卷二十八黎陽廢縣在徽州休寧縣西北吳析歙縣地置休寧縣本歙縣地吳析置休陽縣後以景帝諱改曰海陽晉曰海鹽隋開皇十八年改曰休寧晉書地理志晉平吳改新都曰新安

往近者奉辭伐罪旄麾南指

旄當作旌

時甘寧在江陵

呂蒙傳作夷陵

使張昭攻九江之當塗

方輿紀要卷二十一當塗城在鳳陽府懷遠縣東七里塗山
北麓下

遣張喜將騎赴合肥

武帝紀喜作熹

十五年分豫章爲鄱陽郡分長沙爲漢昌郡

宋書州郡志鄱陽太守治鄱陽縣赤烏八年徙治吳芮故城

所領廣昌上饒葛陽樂安四縣皆云吳立晉書地理志鄱陽郡吳置統廣晉鄱陽樂安餘汗鄒陽歷陵葛陽晉興宋書州郡志又云長沙內史領吳昌侯相後漢立曰漢昌吳更名蓋縣改而郡又廢也

以魯肅爲太守

肅卒以呂蒙爲之

十六年權徙治秣陵

漢志秣陵屬丹陽郡其地本名金陵方輿紀要卷二十今江寧府城六朝時故都也舊志云吳大帝築都城東晉至陳皆因之其城近覆舟山去秦淮五里內爲宮城又紀要卷二十五京城今鎮江府治建安十三年孫權自吳徙鎮於此築京

城周三百六十步於南面西面各開一門因京峴山爲名號曰京鎮尋移秣陵復於此置京督爲重鎮郡有子城周六百三十步卽吳所築内外皆甃以甍號鐵甕城

明年城石頭改秣陵爲建業

吳都賦戎車盈於石城劉涓子注石城石頭隄也在建業西臨江其中有庫藏軍儲寰宇記卷九十石頭城楚威王滅越置金陵邑卽城也吳大帝加脩改名石頭城用貯軍糧器械聞曹公將來侵作濡須塢

水經泄水自濡谿口逕安豐縣北流注於淠謂之濡須口一清案濡谿水卽漢志六安國六縣下之如谿水也班固云首受泚東北至壽春入芍陂濡如音同寰宇記卷百二十四濡

須塢在和州歷陽縣西南一百八十里南臨須水狀如偃月
陸士衡辨亡論曰濡須之戰臨川擁銳卽此處也何云城石
頭以備陸作濡須塢以備水然後建業勢壯

初曹公恐江濱郡縣爲權所略徵令內移民轉相驚自廬江九
江蘄春廣陵戶十餘萬皆東渡江江西遂虛合肥以南惟有皖
城

宋書州郡志三國時江淮爲戰爭之地其間不居者各數百
里淮南虛其地無復民戶吳平民各還本以故射陽廣陵海
陵高郵江都鹽城諸縣皆云三國時廢蓋自陳登爲廣陵太
守屢破孫策之兵不似華歆王朗輩束手就斃後登遷東城
太守以去孫氏遂跨有江表曹公移民以避其鋒每臨大江

而歎恨用登之不終也

取長沙零陵桂陽三郡

晉書地理志長沙郡統臨湘攸下雋醴陵劉陽建寧吳昌羅
蒲圻巴陵一清案巴陵縣孫吳初爲巴丘邸閣晉始置縣宋
書州郡志云巴陵晉太康元年立水經湘水注亦言之本傳
俱作巴丘則吳時未有巴陵之名惟築城以爲儲備耳宋志
是晉書地理志零陵郡統泉陵祁陽零陵營浦洮陽永昌觀
陽營道春陽冷道應陽一清案春陽乃春陵之誤又晉志桂
陽郡統郴耒陽便臨武晉寧南平

使魯肅以萬人屯巴丘

水經湘水注巴丘山在湘水右岸山有巴陵故城本吳之巴

王邸閣城也

注巴丘今日巴陵

日一本作曰是也

權乘駿馬越津橋得去

方輿紀要卷二十六逍遙津在廬州府治東肥水支津也今有飛騎橋相傳卽權超度處

注遼及樂進相遇言不早知之急追自得舉軍歎恨

張遼傳有叱權下戰權不敢動之語何爲不知也此記殆非實錄

權將如吳親乘馬射虎於陵亭

陵音據陵反

寰宇記卷九十二陵亭舖在常州武進縣西五里十與丹陽

疆一本作疆

注向使權從羣臣之義

義一本作議

注吳書

何云書下宋本有曰字

注覽延英俊

何云覽宋本作擘

注封永安鄉侯

宋書州郡志吳興太守領武康令吳分烏程餘杭立永山女縣
晉武帝太康元年更名

注官至少府

御覽卷八百二十引笑林曰沈珩弟峻字叔山有譽而性儉張溫使蜀辭峻峻入內良久出語溫曰向擇一端布欲以送卿而無粗者溫嘉其能顯非

黃武元年春正月陸遜部將軍宋謙等攻蜀五屯

何云軍字衍

注故見身於雞頭

方輿紀要卷七十七雞頭山在荊門州北六十里最高諺云雞頭馬仰去天一丈

注其計不過謂可轉是前述

何云是宋本作足

注魏略載魏三公奏曰

隋書經籍志梁有魏時羣臣表伐吳策一卷

注先帝知權姦以求用時以於禁敗于水災等當討羽

何云等字宋本作籌

注不思靜力致死之節

何云靜宋本作靖

注以爲晁錯不發削弱王侯之謀

何云以爲上宋本有臣字

注魏略曰浩周字孔異上黨人建安中仕爲蕭令

方輿紀要卷二十九蕭城在徐州蕭縣西北十里古蕭國春秋時爲宋附庸秦置縣自兩漢以至南北朝皆爲蕭縣屬沛郡

注此權異心之明效也

冊府異心上有無字

權遂改年臨江拒守

隋書薛道衡傳郭璞云江表偏王三百年還與中國合案江南偏王者起吳大帝孫權黃武元年盡歸命侯皓天紀四年共五十九年又起晉元帝建武元年盡陳後主禎明九年共二百七十七年合得三百三十六年又鼎錄曰孫權黃武元年於彭蠡水沈一鼎其文曰百神助陽侯伏三足大篆書曹休使臧霸以輕船五百敢死萬人襲攻徐陵

方輿紀要卷二十五京口先爲徐陵鎮其地蓋丹徒縣西鄉京口里也通釋徐陵丹徒京城其實一也吳以其臨江津因

置督守之

二年春正月曹真分軍據江陵中州是月城江夏山

水經注江水逕魯山古翼際山也山中有吳江夏太守陸煥所治城蓋取一水之名地理志曰夏水過郡入江故曰江夏也舊治安陸漢高帝六年置吳乃徙此又黃鵠山東北對夏口城魏黃初二年孫權所築依山俯江開勢明遠憑墉藉阻高觀枕流對岸則入沔津故城以夏口爲名亦沙羨縣治也一清案齊書州郡志郢州鎮夏口舊要害也吳置督將爲魯口屯對魯山岸因爲名也程普傳領江夏太守治沙羨此吳置郡立屯之始又方輿紀要卷七十六武昌縣西五十里有梅城居平川中相傳黃武中所築西二十里有仔城皆廢

三國志注卷四十七
注志林曰土行以辰臘得其數矣土盛於戌而以未祀

祀字何氏校改祖

注乃引刀自刺

何云刺下從御覽增中乳房三字

魏以爲蕲春太守

蕲春本漢縣屬江夏郡建安十二年吳立爲蕲春郡

十一月

何云十一月上宋本有冬字

注于寶晉紀曰魏文帝之在廣陵吳人駭

駭上一本有大字

注乃臨江爲疑城自石頭至於江乘

方輿紀要卷二十江乘城在應天府東北七十里本秦縣屬
鄆郡漢屬丹陽孫氏省爲典農都尉治又府西南有橫塘在
秦淮南岸近石頭西陶家渚吳大帝時自江口緣淮築堤謂
之橫塘吳都賦所云橫塘查下樓臺之盛天下莫比者也查
下卽查浦在石頭南上十里

注項峻吳孚

吳當作丁二人亦見辭塋傳丁孚又見齊書禮志又隋書經
籍志始學十二卷吳郎中項峻譔

注紫葢黃旗運在東南

宋書符瑞志漢世術士言黃旗紫葢見於斗牛之間江東有
天子氣寰宇記卷九十司馬德操與劉嗣恭書曰黃旗紫葢

恒見東南終能成天下之功者揚州之君子乎謂斗牛之間恒有此氣一清案庾信哀江南賦作黃旗紫氣

注拜犍爲太守

此郡亦是遙領

冬十二月鄱陽賊彭綺自稱將軍

方輿紀要卷八十五彭綺城在饒州府樂平縣治東卽吳樂安縣也

是歲地連震

晉書五行志黃武四年江東地連震是時權受魏爵命爲大將軍吳王改元專制不修臣節

注吳錄曰是冬魏文帝至廣陵臨江觀兵兵有十餘萬旌旗彌

數百里有渡江之志

方輿紀要卷二十三初自廣陵揚子鎮濟江江面闊相拒四十餘里唐立伊婁埭江闊猶二十餘里宋時瓜州渡口猶十八里今瓜州渡至京口不過七八里又紀要卷二十宋嘉定五年建康守臣王度言府境北據大江是爲天險上自采石下達瓜步千有餘里共置六渡一曰烈山渡二曰南渡浦三曰龍灣渡四曰東陽渡五曰丈城渡六曰閘沙渡

五年

刀劍錄黃武五年採武昌銅鐵作千口劍萬口刀各長三尺九寸刀頭方皆是南銅越炭作之文曰大吳小篆書中華古今注曰吳大帝有寶刀三寶劍六一曰白蛇二曰紫電三曰

辟邪四曰奔星五曰青冥六曰百里刀一曰百鍊二曰青嶺
三月漏景又寰宇記卷百五十七引南越志云趙佗之墓黃
武五年孫權使交趾治中從事呂瑜訪鑿佗墓功費彌多卒
不能得掘嬰齊墓卽佗之子得珠襦玉匣之具金印三十六
一皇帝信璽一皇帝行璽餘文天子也又得印三紐銅劍三
枚並爛若龍文其一刻曰純鉤二曰干將三曰莫邪皆雜玉
爲匣水經泂水注引王範交廣春秋曰南越王趙佗之葬也
因山爲墳其璽塋可謂奢大葬積珍玩吳時遣使發掘其墓
求索棺柩鑿山破石費日損力卒無所獲一清案此殆與發
上中郎模金校尉同其酷暴也

車中八牛以爲四耦

宋書禮志犢車駟車之流也孫權云車中八牛卽犢車也

征江夏圍石陽

宋書州郡志江夏又有曲陵縣本名石陽吳立一清案吳所立之石陽屬廬陵郡今峽江之地宋志以石梵當之誤也分三郡惡地十縣置東安郡

何云三郡上不著丹陽吳會稽疑是脫文方輿紀要卷九十東安城在杭州富陽縣北十八里郡守全琮築城一清案十縣之名不可攷宋書州郡志以吳郡之新城爲吳立又建德桐廬壽昌三縣皆是吳分富春立疑皆屬東安後罷郡以縣屬吳也

注吳錄曰郡治富春也

宋書州郡志富陽漢舊縣本曰富春孫權以爲東安郡七年
省何云北宋本無也字

是歲分交州置廣州

方輿紀要卷百孫吳廣州治番禺交州還治龍編

注權於武昌新裝大船名爲長安試泛之釣臺沂

沂當作圻奚囊橘柚曰孫權命工人滿芳造船夜夢一老父

謂曰船將下參第相微

楫之下水處

更殺其角柁

福柁離水處曰福

宜更

殺其頓

福上曲處曰頓

則日行千里矣言畢化赤龍飛去如法果然

中華古今注孫權時號舸爲赤龍小船爲馳馬言如龍之飛

於天馬之走陸地也吳都賦弘舸連軸巨檻接舳飛雲葢海

制非常模劉淵林云飛雲葢海吳樓船之有名者李善云江

表傳孫權乘飛雲大船張銑云飛雲船上樓名方輿紀要卷七十六釣臺在武昌縣北門外大江中大江回曲處在樊口者曰大回在釣臺下者曰小回唐元結歌叢石橫大江又云是釣臺水石相衝擊此中爲小回是也

注權曰當張頭取羅州

水經江水注邾城南對蘆洲舊時吳築客舍於洲上方便唯所止焉亦謂之羅洲矣

注是以利輒敢以死爭權於是貴重之自此後不復名之常呼曰谷

寰宇記卷百十二敗船灣在武昌縣西北水路七里武昌記權與羣臣泛船中流值風至樊口十餘里便敗因名敗船灣

水經注江水樊口之北有灣昔孫權裝大船名之曰長安亦曰大船載坐直之士三千人與羣臣泛舟江津屬值風起權欲西取蘆洲谷利不從令取樊口薄船舶至岸而敗故名其處爲敗船灣因鑿樊山爲路以上人卽名其處爲吳造峴在樊口上一里今厥處尚存

六年春正月諸將獲彭綺

水經漸江水注萬善歷曰吳黃武六年獲彭綺是歲由拳西鄉有產兒墮地便能語云天方明河欲清鼎腳折金乃生因是詔爲語兒鄉非也禦兒之名遠矣蓋無智之徒因藉地名生情穿鑿耳國語曰句踐之地北至禦兒是也安得引黃武證地哉

是歲改合浦爲珠官郡

宋書州郡志合浦太守漢武帝立孫權黃武七年更名珠官
孫亮復舊朱官長吳立朱作珠朱廬長吳立一清案續郡國
志合浦郡五城合浦徐聞高涼臨允朱崖浦注云建安二十
五年孫權立高涼郡晉書地理志高涼屬高涼郡蓋仍吳之
舊臨允屬蒼梧郡疑亦吳所更合浦郡領縣六有南平毒質
宋志無其建置處所不詳也方輿紀要卷一百五瓊州府東
南有瑋瑁廢縣豈卽晉之毒質乎又紀要卷一百四珠母海
在廉州府東南八十里巨海中中有七珠池曰青鶯曰楊梅
曰烏泥曰白沙曰平江曰斷望曰海渚後爲五池其東爲斷
望對達二池無珠西爲平江楊梅青鶯三池有大蚌剖而有

珠今止以三池名所謂合浦珠也

黃龍元年

拾遺記黃龍元年吳都武昌時越鵠之南獻背明鳥形如鶴
止不向明巢常對北多肉少毛聲音百變間鐘磬笙竽之聲
則奮翅搖頭時人以爲吉祥是歲遷都建業殊方多貢珍奇
吳人語謠呼背明爲背亡鳥國中以爲大妖不及百年當有
喪亂背叛滅亡之事散逸奔逃墟無烟火果如斯言後此鳥
不知所在

丙申南郊卽皇帝位

水經江水注武昌城西有郊壇權告天卽位於此又武昌記
曰樊口南有大姥廟孫權嘗獵樊山下依夕見一姥問權獵

何所得曰正得一豹姥曰何不豎豹尾忽然不見權事應在此故爲立廟也鼎錄曰權爲姥立廟并作一鼎文曰豹尾鼎又方輿紀要卷八十一道州江華縣南吳望山舊名秦山孫權未建號時山忽開洞穴石有文采權以爲瑞

注歷年四百三十有四

宋書禮志載此文無有四二字

注漢氏已絕祀於天

宋志無祀字

注左右有吳永終天祿

宋志作永綏天極

閩昌門

宋書符瑞志闔閭作閭

注昌門吳西郭門夫差所作

寰宇記卷九十一閭闔門吳城西門也以天門通閭闔故名之又郡國志云吳由此伐楚國改爲破楚門

權遷都建業因故府不改館

此卽長沙桓王故府太康地記所稱太和宮也

求夷洲及亶洲

後漢書東夷傳會稽海外有夷洲及亶洲注引沈瑩臨海水志曰夷洲在臨海東南去郡二千里土地無霜雪草木不死四面是山谿人皆髡髮穿耳女人不穿耳土地饒沃旣生五穀又多魚肉有犬尾短如麕尾狀此夷舅姑子婦卧息共

一大牀畧不相避地有鋼鐵唯用鹿格爲矛以戰鬪摩礪青石以作弓矢取生魚肉雜貯大瓦器以鹽鹵之歷月餘日乃啖食之以爲上肴也

由拳野稻自生改爲禾興縣

宋書州郡志嘉興本名長水秦改曰由拳吳黃龍四年由拳縣生嘉禾改曰禾興孫皓父名和又改曰嘉興四年字誤當作三年

會稽南始平言嘉禾生

方輿紀要卷九十二天台縣本漢章安縣地三國吳析置南始平縣或曰後漢興平四年孫氏析置也

嘉禾元年

御覽卷百七十六引金陵地記嘉禾元年於桂林落星山起
重樓名曰落星樓吳都賦數軍實於桂林之苑饗戎旅乎落
星之樓注云吳有桂林苑落星樓樓在建業東北十里

冬十月魏遼東太守公孫淵遣校尉宿舒閭中令孫綜稱藩於
權

何云通鑑閭作郎

注頃者嘉瑞屢臻

臻一本作徵

注復書曰伏見漢書郊祀志匡衡奏從甘泉河東郊於鄠權曰
文王性謙讓處諸侯之位明未郊也經傳無明文匡衡俗儒意
說非典籍正義不可用也

宋書禮志復書作復奏奏從作奏徒甘泉句作甘泉河東郊
於長安言文王郊於鄠性上有德字匡衡上有由字疑此有
脫誤又宋書五行志權稱帝三十年竟不於建業創七廟但
有父堅一廟遠在長沙而郊禋禮闕嘉禾初羣臣奏宜郊祀
又弗許末年雖一南郊而北郊遂無聞焉且三江五湖衡霍
會稽皆吳楚之望亦不見秩反禮羅陽妖神以求福助禮志
何承天云權建號繼天而郊享有闕固非也末年雖一南郊
而遂無北郊之禮環氏吳紀權思崇嚴父配天之義追上父
堅尊號爲始祖如此說則權末年所郊堅配天也權卒後三
嗣主終吳世不郊祀則權不享配帝之禮矣

注故詩曰后稷肇祀庶無罪侮

悔當作悔

使太常張彌執金吾許晏將軍賀達等將兵萬人金寶珍貨九錫備物乘海授淵

方輿紀要卷二十四太倉城今州治相傳孫權都吳嘗置倉於此或曰權求好於公孫淵欲遣兵北出故於此置倉也亦謂之東倉

注雖昔竇融背棄隴右卒占西河

西河當作河西

權大怒欲自征淵

何云安溪云此爲可恥之甚可悔之甚而繼之以怒醜哉世說注引列女傳曰趙姬者桐鄉令東郡虞夏妻潁川趙氏女

也才敏多覽題既授大皇帝敬其文才詔入宮省上欲自征
公孫嬪姬上疏以諫作列女傳解詭趙母注賦數十萬言赤
烏六年卒

注奉聞之到還

到倒古通

注宮遣主簿竿杏帶固等出安平

續郡國志遼東郡西安平注引魏氏春秋曰縣北有小水南
流入海句驤別種因名小水貂

夏五月權遣陸遜諸葛瑾等屯江夏河口

方輿紀要卷七十六鳳棲山在漢陽郡治後今郡城環其上
迤西之山亦曰魯山志云郡城東北有吳王磯吳魏相持時

皆以沔口爲重鎮吳守此磯以爲險固有鐵門關在其旁

孫韶張承等向廣陵淮陽

宋書州郡志廣陵太守晉武帝太康三年治淮陰故城後又
治射陽屬縣海陵高郵江都鹽城俱三國時廢一清案上云
江夏沔口一地也下云合肥新城亦一地也此云廣陵淮陽
書法不例考後漢書廣陵郡治廣陵三國屬魏爲重鎮陳登
爲太守徙治射陽又移治淮陰而以故城爲邊邑黃初五年
伐吳自壽春至廣陵登故城臨江觀兵胡三省曰廣陵故城
卽蕪城矣後吳人得其地孫峻使馮朝城廣陵是也淮陽後
漢爲陳國今開封府陳州去廣陵甚遠淮陽是淮陰之誤無
疑方輿紀要卷二十二淮陰城在淮安府西北四十里漢屬

臨淮郡後漢改屬下邳國晉爲廣陵郡治則宋志云廣陵晉太康時治淮陰或仍魏置耳

自率水軍東征未至壽春

晉書地理志江西廬江九江之地自合肥之北至壽春悉屬魏

秋八月以諸葛恪爲丹陽太守

晉書地理志丹陽郡統縣十一有建鄴秣陵二縣注云建鄴本秣陵孫氏改爲建業武帝平吳以爲秣陵太康三年分秣陵北爲建業改業爲鄴一清案宋書州郡志云孫權改秣陵爲建業秣陵其地本名金陵秦始皇改然則吳時有建業無秣陵至晉乃分立故晉志兩書之又孫權嘗分丹陽爲臨川

郡以朱然爲太守其地不知在何所諸葛恪爲丹陽太守斬
白陽長胡伉似亦丹陽屬縣其建置處所不詳

九月朔隕霜傷穀

宋書五行志是時校事呂壹專作威福與漢元帝時石顯用
事隕霜同應班固書九月二日陳壽言朔皆明未可以傷穀
也

秋七月有雹

宋書五行志作雨雹志曰七月雨雹又隕霜是時呂壹作威
用事詆毀重臣排陷無辜自太子登以下咸患毒之漢安帝
信讒多殺無辜亦雨雹

五年春鑄大錢一當五百

泉志大泉五百錢舊譜曰徑寸二分重十二銖文曰大泉五百此泉徑寸一分重四銖六黍今世有之方輿紀要卷二十治城在江寧府西石城門內本吳治鑄處

其後吳令孟宗喪母奔赴已而自拘於武昌以聽刑陸遜陳其素行因爲之請權乃減宗一等後不得以爲比因此遂絕

晉書五行志吳之風俗相驅以急言論彈射以刻薄相尚居三年之喪往往有致毀以死諸葛患之著正交論雖不可以經訓整亂蓋亦救時之作也

赤烏元年春

宋書符瑞志三月零陵言甘露降一清案此在二年三月

鑄當千大錢

晉書食貨志孫權鑄當千錢故呂蒙定荊州賜錢一億錢既太貴但有空名人間患之晉自中原喪亂元帝過江用孫氏舊錢輕重雜行大者謂之比輪中者謂之四文泉志曰此泉有二品大者徑寸五分重十二銖六黍字文夷漫輪郭重厚頗難得之小者徑寸三分重七銖二黍世多有之通典曰當千大銖徑一寸四分重十六銖何云錢當五百已不可通行又鑄當千徒爲妄作有以知吳之無制也

秋八月武昌言麒麟見

宋書符瑞志又云白麟見建業

二年

方輿紀要卷二十七廬江縣西北四十里金牛山巔有塔吳

赤烏二年造又有馬槽山上有寨壘相傳曹魏所作蓋南北相持故各建樹以爲升高瞭望之所又明史禮志蕪湖城隍祠赤烏二年建

注父札才學博達

札字何氏校改禮

注稍遷建安太守

孫休永安三年始立建安郡是時尚爲會稽南部都尉地不應先有建安之名

夏五月城沙羨

沙羨卽江夏也黃武二年城之今復築晉書五行志赤烏二年五月地再震是時呂壹專事案壹於元年已伏誅此爲誤

也

祕所領都督廖式殺臨賀太守嚴綱等

宋書州郡志臨慶內史吳分蒼梧立爲臨賀郡屬廣州方輿
紀要卷一百七臨賀廢縣在廣西平樂府賀縣漢置屬蒼梧
郡吳置臨賀郡治此

三年春正月

何云正月宋本作二月

年穀有損而吏不良

吏下宋本有或字

遣衛將軍全琮畧淮南汝弔陂燒安成邸閣

兩漢志汝南郡安成侯國一清案安成城在河南汝寧府東

南十七里疑迂遠壽州南有安成縣城梁普通五年豫州刺史裴邃攻壽陽之安城旣而馬頭安城皆降宜此爲是蓋吳境不得越淮而北至汝南也三國時魏邊境戍守處

注漢晉春秋曰零陵太守殷札言於權曰

何云札乃禮字之譌見顧邵傳中字德嗣

注授諸葛瑾朱然大眾指事襄陽

何氏從通鑑作直指襄陽

閏月大將軍瑾卒

諸葛瑾不書姓史缺文

秋八月陸遜城邾

方輿紀要卷七十六邾城今黃州府城也三國初屬魏吳赤

烏四年陸遜拔邾築城置戍以爲重鎮一清案此事遜傳不載晉書陶侃傳議者以武昌北岸有邾城宜分兵鎮之侃曰邾城隔在江北吳時此城乃三萬兵守之

百官奏立皇后及四王

晉書地理志孫權赤烏五年亦取中州嘉號封建諸王其戶五十二萬三十男女口二百四十萬通典曰戶五十二萬男女口二百三十萬

三月海鹽縣言黃龍見

漢志海鹽故武原鄉屬會稽郡後漢屬吳郡

秋七月遣將軍聶友校尉陸凱以兵三萬討珠崖儋耳

晉書地理志漢武帝元封中置儋耳珠崖二郡置交趾刺史

以督之昭帝元始五年罷儋耳并珠崖元帝元初三年又罷珠崖郡赤烏五年復置珠崖郡晉平吳後省珠崖入合浦方輿紀要卷一百五朱崖治疇都去長安七千三百三十四里儋耳去長安七千三百三十五里今廣東瓊州府崖州儋州是其境也

十二月扶南王范旃遣使獻樂人及方物

南史扶南國日南郡之南海西大灣中去林邑三千餘里其國廣輪三千餘里以女人爲王號曰柳葉其南有激國有事鬼神者字混填夢神賜之弓乘賈人舶入晨起詣廟於神樹下得弓便乘舶入海至扶南外邑柳葉人眾見舶欲劫取之混填張弓射其舶穿度一面矢及侍者柳葉懼舉眾降混填

遂君其國納柳葉爲妻其後王盤盤以國事委其大將范蔓
盤盤死國人共舉蔓爲王蔓姊子旃纂蔓自立旃大將范尋
又代立吳時遣中郎康泰宣化從事朱應使於尋國國人猶
裸唯婦人著貫頭泰應謂曰國中實佳但人褻露可怪耳尋
始令男子著橫幅橫幅今干漫也大家乃截錦爲之貧者乃
用布又中天竺傳吳時扶南王范旃遣親人蘇勿使其國從
扶南發投拘利口循海大灣中正西北入歷灣邊數國可一
年餘到天竺江口逆水行七千里乃至焉天竺王驚曰海濱
極遠猶有此人乎卽令觀視國內仍差陳宋等二人以月支
馬四匹報旃勿積四年方至其時吳遣中郎康泰使扶南及
見陳宋等具問天竺土俗云佛道所興國也

諸葛恪自皖遷於柴桑

方輿紀要卷二十六胡氏曰漢文帝分淮南爲廬江國在江南班志廬江郡則在江北蓋兩漢廬江郡皆治舒三國時吳擊魏廬江滿寵曰權舍船二百里懸軍深入恐其走不及耳蓋是時廬江郡改治陽泉縣也孫氏亦置廬江郡治皖

夏雷霆犯宮門柱又擊南津大橋楹

方輿紀要卷二十今聚寶門內鎮淮橋卽孫吳之南津橋晉之朱雀桁也胡氏曰橋在孫吳建業宮城朱雀門南跨秦淮水南北岸以渡行人亦謂之南航以在臺城南也亦謂之大航以秦淮諸航此爲最也

注吳歷曰茂本淮南鍾離長而爲王淩所失叛歸吳吳以爲征

西將軍九江太守外部督封侯領千兵

宋書州郡志淮南太守秦立爲九江郡兼得廬江豫章漢高
帝四年更名淮南國分立豫章郡文帝又分爲廬江郡武帝
元狩元年復爲九江郡治壽春縣後漢徙治陰陵縣魏復曰
淮南治壽春晉武帝太康元年復立歷陽當塗遼道諸縣二
年復立鍾離縣並二漢舊縣也三國時江淮爲戰爭之地其
間不居者各數十里此諸縣並在江北淮南虛其地無復民
戶吳平民各還本故復立焉晉書地理志吳揚州統十四郡
江西廬江九江之地自合肥之北至壽春悉屬魏然則此九
江郡亦虛號耳故晉志不數也

注伺權在苑守

何氏從宋本守改中

注茂引兵去苑

去一本作入

鑿句容中道自小其

一本作卜其疑皆有禹

至雲陽西城通會市作邸閣

何云宋本作鑿句容中道山直至雲陽西城方輿紀要卷二
十五曲阿古曰雲陽今丹陽縣治陳勳蓋鑿茅山之麓以通
道也破岡瀆在丹陽縣西南輿地志延陵有東雲陽西雲陽
二瀆相去七里與句容縣接境吳赤烏中所鑿自延陵以至
江寧上下各七埭長岡埭在縣西南卽破岡瀆中七埭之一
又紀要卷二十方山埭在江寧府東南四十五里建康實錄
吳赤烏八年使校尉陳勳發屯兵於方山南絕淮立埭是也

運瀆在上元縣治西北赤烏八年發兵鑿句容中道至雲陽
西城以通吳會船艦號破岡瀆又使郗儉鑿城西南自秦淮
北抵倉城以達吳越運船蓋引破岡瀆由方山埭接於秦淮
以避大江之險又自秦淮而東北達於苑倉也舊有六橋跨
其上又潮溝在上元縣西四里赤烏中所鑿引江潮抵青溪
接秦淮水西通運瀆北連後河

九年

方輿紀要卷七十六赤烏九年分武昌爲兩郡自武昌至蒲
圻爲右郡始置蒲圻縣以湖畔多蒲故名也

注權出涂中遂至高山潛軍以待之

滁州高山惟州西北二十二里清流山最爲險峻南唐於此

置清流關今行旅猶稱曰關山疑是史所謂涂中高山也

二月權適南宮三月改作太初宮

方輿紀要卷二十南宮在秦淮上吳太子宫也吳大帝遷都建業徙武昌宮室材瓦繕太初宮其正殿曰神龍中門曰公車中門之東曰昇賢又東曰左掖中門之西曰明揚又西曰右掖又東面門曰蒼龍西面門曰白虎北面門曰玄武繼又於宮中作臨海赤烏等殿彎碣臨碕等門左思吳都賦云抗神龍之華殿施榮楯而捷獵崇臨海之崔嵬飾赤烏之韡曄東西膠葛南北崢嶸房櫳對橫連閣相經闔闔譎詭異出奇名左稱彎碣右號臨碕

二月地仍震

晉書五行志二月江東地仍震是時權聽讒尋出朱據廢太子又天文志二月白虹貫日權發詔戒懼

雲陽言黃龍見

宋書符瑞志黃龍又見武陵吳壽光色炫耀

注吳錄曰六月戊戌寶鼎出臨平湖八月癸丑白鳩見於章安宋書符瑞志寶鼎又出東郡鄆縣又云孫權時靈龜出會稽章安

十三年夏五月日至熒惑入南斗

晉書天文志案占熒惑入南斗三月吳王死一曰熒惑逆行其地有死君太元二年權薨是其應也

八月丹陽句容及故鄣寧國諸山崩鵠水溢

兩漢志丹陽郡故鄣晉書五行志劉歆以爲國主山川崩
川竭亡之徵也後二年而權薨又二十六年而吳亡

遣軍十萬作堂邑涂塘以淹北道

方輿紀要卷二十六合縣春秋時楚之棠邑三國時爲吳魏
分界處有瓦梁壘在縣西五十五里亦曰瓦梁堰卽涂塘也
堰上有瓦梁城卽孫權屯兵處一清案棠堂古通涂音除
遣將軍戴烈陸凱往拒之

晉書戴若思傳若思廣陵人祖烈吳左將軍

初臨海羅陽縣有神自稱王表

宋書州郡志臨海太守本會稽東部都尉孫亮太平二年立
此云臨海羅陽縣蓋史家追書之又永嘉太守領縣五安固

三國志注補卷四十七
令吳立曰羅陽孫皓改曰安陽晉太康元年更名

吳高陵松栢斯拔

宋書五行志拔高陵樹二株石碑蹉動案華覈對役繁賦重
匿督不叡之罰也明年權薨

秋七月葬蔣陵

寰宇記卷九十陵在上元縣東北蔣山八里丹陽記蔣陵因
山爲名蔣山古曰金陵山亦曰鍾山吳大帝時有蔣子文發
神異於此封子文爲蔣侯改曰蔣山子文事見搜神記及幽
明錄

三國志注補卷四十七

番禺許之璇初校
番禺陶邵學覆校

陽湖吳翊寅再覆校